



**USAID**  
OD AMERIČKOG NARODA

# JAVNI POZIV ZA DOSTAVLJANJE PROJEKTNIH PRIJEDLOGA

Oznaka poziva:	20.04.0-N2.3-6928
Naziv poziva:	<b>Podrška aktivnostima nevladinih organizacija u borbi protiv trgovine ljudima</b>
Rok za dostavljanje projektnih prijedloga:	17. februara 2023. godine do 16.00 sati

## Javni poziv za dostavljanje projektnih prijedloga

Kroz Program podrške zaštiti ljudskih prava (USAID/INSPIRE), Američka agencija za međunarodni razvoj (USAID) osnažuje građane i vlasti u BiH kako bi unaprijedili zaštitu ljudskih prava te pružili bolje usluge i prilike za zapošljavanje marginaliziranim grupama u Bosni i Hercegovini. Marginalizirane grupe u BiH susreću se s velikim izazovima. Zato je ključno kontinuirano pružati podršku onima kojima je potrebna, među kojima se nalaze i žrtve trgovine ljudima.

USAID/INSPIRE poziva nevladine organizacije registrirane u Bosni i Hercegovini (udruženja i fondacije osnovane prema zakonima o udruženjima i fondacijama u BiH) da dostave svoje projektne prijedloge u okviru komponente za pružanje **Podrške aktivnostima nevladinih organizacija u borbi protiv trgovine ljudima**.

Na Javni poziv ne mogu se prijaviti: javne ustanove, institucije vlasti, privredna društva, vjerske organizacije, politički subjekti, kao ni međunarodne nevladine organizacije koje nemaju registrirano svoje predstavništvo u Bosni i Hercegovini u skladu sa zakonima o udruženjima i fondacijama u BiH.

Sve projektne aktivnosti moraju se realizirati u Bosni i Hercegovini.

Projektne prijedlozi mogu se dostavljati za cjelokupni ili djelomični iznos sredstava potrebnih za implementaciju dostavljenog projekta. Iznos predloženog administrativnog dijela budžeta (plate, doprinosi, porezi, režijski i uredski troškovi) ne može iznositi više od 40% od ukupnog budžeta.

Ukupni raspoloživi fond sredstava po ovom Javnom pozivu iznosi 750.000 BAM. Minimalni iznos sredstava koja se traže od USAID/INSPIRE ne može biti manji od 50.000 BAM, a maksimalan iznos traženih sredstava ne može prelaziti 250.000 BAM. Trajanje projekta ne može biti kraće od 12 mjeseci ni duže od 20 mjeseci.

Sva pitanja koja se tiču ovog Javnog poziva dostavljaju se isključivo putem e-mail adrese: [prijava@usaidinspire.ba](mailto:prijava@usaidinspire.ba), (subject/predmet: 20.04.0-N2.3-6928, Upit) do 10. februara 2023. godine.

U utorak, 31. januara 2023. g., s početkom u 11.00 sati održat će se online info-sesija vezana za Javni poziv 20.04.0-N2.3-6928, *Podrška aktivnostima nevladinih organizacija u borbi protiv trgovine ljudima*. Link za prisustvo online info sesiji: <https://s.usaidinspire.ba/ctip23is>

Puni tekst Javnog poziva kao i svi potrebni obrasci dostupni su na online platformi za upravljanje grantovima APPLY na linku: <https://s.usaidinspire.ba/applycl>

Od aplikanta se traži da **do 17. 2. 2023. do 16.00 sati** dostave nacrt projektnog prijedloga u elektronskom obliku, sa svim traženim priložima, nakon što se registriraju kao organizacija (*organisation*) na online platformi za upravljanje grantovima APPLY. U sklopu aplikacije trebaju popuniti sve podatke o svojoj organizaciji i odabrati komponentu na koju apliciraju unutar programa USAID/INSPIRE, nakon čega će odmah dobiti automatski e-mail kao potvrdu o prijemu aplikacije. Nacrti projektnih prijedloga koji ne budu dostavljeni na navedeni način i do navedenog roka neće biti uzeti u razmatranje.

**Napomena:** Svi potencijalni aplikanti trebaju pristupiti registraciji na online platformi za upravljanje grantovima APPLY čim prije, kako bi se upoznali s uvjetima i tehničkim postavkama aplikacije, a putem

linka: <https://s.usaidinspire.ba/apply>. Molimo vas da taj link spasite u svoje kratice (*bookmarks*) ako namjeravate aplicirati na USAID/INSPIRE sada ili u budućnosti, a detaljne instrukcije o procesu registracije možete pronaći na linku: <https://s.usaidinspire.ba/applyti>. Ukoliko ste već registrirani na online platformi za upravljanje grantovima APPLY, možete dobiti više informacija klikom na dugme „Pages“ u gornjem desnom uglu.

Aplikanti se mole da pažljivo pročitaju tekst Javnog poziva prije nego što počnu s procesom apliciranja i prije nego dostave svoj projektni prijedlog.

## Pozadina borbe protiv trgovine ljudima u BiH

Trgovina ljudima prvenstveno je kriminalna aktivnost, koja često ima karakteristike organiziranog i prekograničnog kriminaliteta, ali je ujedno i teško kršenje ljudskih prava zagwarantiranih međunarodnim pravom, Ustavom BiH, entitetskim ustavima i Statutom Brčko distrikta BiH.<sup>1</sup> Vlasti Bosne i Hercegovine ne pridržavaju se u potpunosti minimalnih standarda za eliminiranje trgovine ljudima, ali ulažu značajna nastojanja u tom pravcu. Bosanskohercegovačke vlasti pokazale su općenito povećana nastojanja u poređenju s prethodnim Izvještajem o trgovini ljudima američke vlade<sup>2</sup> uzimajući u obzir eventualni utjecaj pandemije bolesti COVID-19 na njihov kapacitet borbe protiv trgovine ljudima; stoga je Bosna i Hercegovina ostala na nivou 2. Među njima je i jačanje ukupnih nastojanja u pravcu procesuiranja na nivou države, u Republici Srpskoj (RS) i Brčko distriktu BiH, gdje je osuđen veći broj trgovaca ljudima, i u Federaciji Bosne i Hercegovine (Federacija BiH) u kojoj su istrage vođene i optužnice podignute protiv većeg broja osumnjičenih. Sudije su izrekle veći broj kazni zatvora u znatnom trajanju i Tužilaštvo BiH je formiralo poseban odjel sa tri tužioca. Vlasti su ažurirale standardne operativne procedure (SOP) za identifikaciju žrtava i prvi put su identificirale žrtve u neregularnim migrantskim tokovima. Federacija BiH, RS, Brčko distrikt BiH i svih 10 kantona usvojili su akcione planove, a dva kantona su odobrila i isplatila honorare svim članovima lokalnih koordinacionih timova.

Međutim, vlasti nisu ispunile minimalne standarde u nekoliko ključnih oblasti. Vlasti su identificirale manji broj žrtava, a organima za provođenje zakona i dalje nedostaju kapaciteti, resursi i stručno znanje, što im onemogućava da provode djelotvorne istrage i krivično gonjenje usmjereno na žrtve. Organi vlasti nisu istraživali slučajeve potencijalnog prisilnog prosjačenja djece i prisilnog rada u kojem su žrtve Romi, nego su ih radije pravdali kao tradicionalne kulturološke prakse i običaje i djecu vraćali u njihove porodice, čak i kada su roditelji bili uključeni u iskorištavanje svoje djece.

SIPA i dalje vodi operativni tim od 20 službenika iz četiri regionalna ureda, a Tuzlanski kanton u Federaciji i dalje ima specijalnu jedinicu za borbu protiv trgovine ljudima, osim oficira za vezu za trgovinu ljudima u svim policijskim jedinicama u Kantonu. Kanton Sarajevo imenovao je po dva policijska službenika u svakoj od sedam policijskih stanica oficirima za vezu. U 2021. g. Tužilaštvo BiH formiralo je Odjel za borbu protiv trgovine ljudima i nelegalne migracije, u kojem rade tri specijalna tužioca.

<sup>1</sup> Vijeće ministara BiH, Strategija suprotstavljanja trgovini ljudima u Bosni i Hercegovini 2020 – 2023.

<sup>2</sup> <https://www.state.gov/reports/2022-trafficking-in-persons-report/bosnia-and-herzegovina/>, juli 2022. g.

Vlasti su smanjile nastojanja u pravcu zaštite žrtava. Identificirale su 61 žrtvu trgovine ljudima, što je manji broj u odnosu na 80 žrtava identificiranih u 2020. g. Od toga je šest žrtava trgovine ljudima u svrhu seksualnog iskorištavanja, 54 žrtve prisilnog rada i jedno iskorištavanje žrtve je neodređeno; šest žrtava su ženskog spola, a jedna žrtva muškog, 27 žrtava su dječaci i 27 žrtava su djevojčice, a pet su žrtve strani državljani. Vlasti vode sedam dnevnih centara za djecu i mobilni tim za ranjivu djecu, koji je proveo aktivnosti na terenu na pronalasku djece u skitnji i prosjačenju u Sarajevu. Mobilni tim je identificirao 150 žrtava (165 u 2020. godini) i dnevni centri su za djecu osigurali pomoć u učenju, tople obroke i usluge pranja veša (za 373 djeteta u 2020. g). Vlasti su, uz finansijsku i tehničku pomoć nevladinih organizacija, uspostavile šest novih mobilnih timova. Međutim, dnevni centri nemaju resurse, kapacitete ni osoblje i mogli su osigurati samo osnovnu hranu, organizirati radionice i pružiti kratkoročan smještaj za mali broj djece.

Vlasti nisu uplatile sredstva nevladinim organizacijama zato što nije bio donesen državni budžet uslijed produžene političke krize. Iako nisu bile finansirane, nevladine organizacije su nastavile pružati usluge žrtvama u toku 2021. g. Vlasti su u saradnji s nevladinim organizacijama pružile smještaj, psihosocijalnu podršku, medicinsku pomoć i pravnu pomoć; međutim, ne postoje mehanizmi za pružanje usluga žrtvama izvan sigurnih kuća, kao ni u centrima za socijalni rad. Tokom 2020. g. u sigurnim kućama asistirana je 41 žrtva trgovine ljudima, dok je tokom 2021. g. 56 žrtava primilo pomoć u sigurnim kućama koje vode nevladine organizacije. Dok pristup mjerama zaštite nije standardiziran i temeljen je na aktima koji nisu pravno obavezujući, vlasti su u saradnji sa jednom nevladinom organizacijom izradile smjernice i standarde za pružanje pomoći žrtvama, posebno djeci.

Vlasti su zbog neadekvatnih nastojanja u pravcu identifikacije žrtava kažnjavale žrtve za nezakonita djela na koja su ih prisiljavali trgovci; organi vlasti su prekršajno kažnjavali žrtve trgovine ljudima u svrhu seksualnog iskorištavanja, prisilnog prosjačenja i prisiljavanja na činjenje krivičnih djela i neke žrtve moraju platiti iznos od 10.000 do 15.000 KM nakon što im je izrečeno više novčanih kazni. Vlasti su izvjestile da standardne operativne procedure sadrže standarde o zabrani kažnjavanja žrtve, ali su priznale da se žrtve i dalje kažnjavaju zato što nadležne institucije ne poznaju standardne operativne procedure, a takva situacija je otežana čestim rotacijama, odlaskom službenika i zapošljavanjem novih.

Vlasti su povećale nastojanja u pravcu prevencije trgovine ljudima. Nastavile su provoditi državnu strategiju za period 2020 – 2023, a Državni koordinator nastavio je izrađivati godišnje izvještaje i organizirao je tri koordinacijska sastanka. Kao što je izvještavano u prethodnih pet godina, trgovci ljudima iskorištavaju domaće i strane žrtve u BiH i trgovci iskorištavaju žrtve iz BiH u stranim zemljama. U 2020. g. trgovci ljudima su iskorištavali strane žrtve iz Sjeverne Makedonije i Pakistana. Trgovci ljudima podvrgavaju punoljetne i maloljetne ženske osobe iz BiH trgovini ljudima u svrhu seksualnog iskorištavanja unutar zemlje u privatnim stanovima i motelima. Romska djeca se iskorištavaju za prisilno prosjačenje, izvršenje krivičnih djela, pružanje seksualnih usluga i služenje u domaćinstvu u prisilno sklopljenim brakovima. Na hiljade migranata i izbjeglica iz Afganistana, Bangladeša, Iraka, Maroka, Pakistana, Sirije i susjednih zemalja, posebno žene i djeca bez pratnje, koji prolaze kroz BiH ili su zaglavljani u BiH ili se krijumčare kroz BiH, u opasnosti su da postanu žrtve trgovine ljudima.

Program podrške zaštiti ljudskih prava USAID/INSPIRE dodijelio je grantove u oblasti borbe protiv trgovine ljudima tokom 2021. i 2022. godine, koji su trenutno u toku. Više o projektima koji su u procesu implementacije molimo pogledajte <https://s.usaidinspire.ba/PodrzaniA-TIP>, kako bi se spriječilo ponavljanje istih ili vrlo sličnih projekata na istim lokacijama.

## Opće smjernice za aplikante

Ovaj Javni poziv (broj 20.04.0-N2.3-6928) sastoji se od 2 faze – 1. faza (nacrt projektnog prijedloga, uz ostalu dokumentaciju) i 2. faza (puni projektni prijedlog i budžet, uz ostalu dokumentaciju).

Značajno je da aplikant preduzme mjere da u svakoj aktivnosti korisnici projekta ni na koji način nisu izloženi potencijalnom riziku od neugodnosti, neprijatnosti ili rizika narušavanja ljudskih prava.

Sve smjernice navedene u ovom Javnom pozivu odnose se i na 1. i na 2. fazu apliciranja, tako da je važno konsultirati ovaj dokument i pri apliciranju u 2. fazi, ukoliko aplikant zadovolji 1. fazu.

**Nije dozvoljeno korištenje sredstava za rekonstrukcijske radove po ovom Javnom pozivu. Dozvoljen je rad isključivo s nepolicijskim službenicima.**

Traženi iznos u 2. fazi mora biti jednak ili niži onom iznosu traženom u 1. fazi (niži u slučaju pronalaska dodatnih donatora do 2. faze). Planirano trajanje projekta u 2. fazi ne može biti drugačije u odnosu na 1. fazu.

## Oblasti Javnog poziva

Projektni prijedlozi trebaju se odnositi na sljedeće oblasti, a u skladu sa Strategijom suprotstavljanja trgovini ljudima u Bosni i Hercegovini 2020 – 2023:

- **Oblast 1:** Uključivanje romskih nevladinih organizacija i organizacija koje imaju iskustvo u radu s romskom zajednicom u BiH u postupanje po referalnom mehanizmu, njihovo jačanje i uključivanje u rad koordinacionih timova u kantonima i entitetima te uključivanje u mehanizme i protokole u lokalnim zajednicama.
- **Oblast 2:** Direktno medicinske, repatrijacijske, pravne, transportne i druge usluge pomoći djeci i adolescentima kao žrtvama trgovine ljudima kroz dnevne centre za osobe koje rade i žive na ulici.
- **Oblast 3:** Jačanje kapaciteta službenika za podršku svjedocima u tužilaštvima i sudovima za pružanje pomoći i podrške žrtvama trgovine ljudima koje su svjedoci u predmetima trgovine ljudima, te uključivanje službenika za podršku svjedocima u referalni mehanizam za žrtve trgovine ljudima u Bosni i Hercegovini;
- **Oblast 4:** Jačanje kapaciteta preživjelih žrtava trgovine ljudima za uključivanje u procese razvoja politika suprotstavljanja trgovini ljudima i uključivanje u operativne procese borbe protiv trgovine ljudima, te pružanje podrške preživjelim žrtvama trgovine ljudima za uključivanje u ove procese.
- **Oblast 5:** Jačanje kapaciteta jedinica lokalne samouprave za suprotstavljanje trgovini ljudima kroz uspostavu mobilnih identifikacijskih timova i usvajanje protokola o postupanju nadležnih institucija i organizacija na nivou jedinica lokalne samouprave i kantona u suprotstavljanju trgovini ljudima.

**Aplikant će u svojoj prijavi navesti kojom se oblašću primarno bavi u svom projektnom prijedlogu. Projektni prijedlozi koji se ne budu uklapali ni u jednu od navedenih oblasti neće biti uzeti u razmatranje.**

## Uvjeti i procedure za apliciranje

USAID/INSPIRE otvara fond za grantove usmjerene na pružanje podrške aktivnostima borbi protiv trgovine ljudima u BiH. Projektni prijedlozi mogu se dostavljati za cjelokupni ili djelomični iznos sredstava potrebnih za implementaciju kandidiranog projekta.

Minimalni iznos sredstava koja se traže od USAID/INSPIRE ne može biti manji od 50.000 BAM a maksimalan iznos traženih sredstava ne može prelaziti 250.000 BAM.

Iznos predloženog administrativnog dijela budžeta (plate, doprinosi, porezi, režijski i uredski troškovi) ne može iznositi više od 40% od ukupnog budžeta koji se traži od USAID-a.

Trajanje projekta ne može biti kraće od 12 mjeseci ni duže od 20 mjeseci.

Tokom implementacije projekata aplikant će biti odgovoran za upravljanje sadržajnim i finansijskim dijelom projekta, kao i za narativno i finansijsko izvještavanje prema USAID-u.

Aplikacije i tražena dokumentacija moraju biti napisane na jednom od službenih jezika i pisama Bosne i Hercegovine. Aplikacije moraju biti popunjene elektronski.

Nepotpune aplikacije, aplikacije koje pristignu nakon navedenog roka, aplikacije koje ne budu dostavljene na predviđeni način, kao i prijave na neodgovarajućim obrascima neće biti uzete u razmatranje. Dokumentacija koja bude dostavljena, a nije tražena, neće biti uzeta u razmatranje.

Sva pitanja koja se tiču ovog Javnog poziva dostavljaju se isključivo putem e-mail adrese: [prijava@usaidinspire.ba](mailto:prijava@usaidinspire.ba) (subject/predmet: 20.04.0-N2.3-6928, Upit) do 10.2.2023. godine.

U utorak, 31. januara 2023. g., s početkom u 11.00 sati održat će se online info-sesija vezana za Javni poziv 20.04.0-N2.3-6928, *Podrška aktivnostima nevladinih organizacija u borbi protiv trgovine ljudima*. Link za prisustvo online info sesiji: <https://s.usaidinspire.ba/ctip23is>. Sve informacije koje budu pružene na online info-sesiji, a da su u suprotnosti sa Javnim pozivom, tekst Javnog poziva bit će mjerodavan.

### I. faza

Projektni prijedlozi dostavljaju se najprije samo u formi nacrtu projektnog prijedloga, koja se nalazi na online platformi za upravljanje grantovima APPLY.

Pored nacrtu projektnog prijedloga potrebno je dostaviti Uvjerenje o poreskoj registraciji (ID broj). Uvjerenje o poreskoj registraciji, kao i sve dokumente koje budete obavezni priložiti uz svoju aplikaciju u narednim fazama, dodajete tako što ćete kroz svoj APPLY profil (ili klikom direktno na link: <https://s.usaidinspire.ba/#eligibility>) **popuniti Eligibility obrazac**, koji možete izmijeniti i dopuniti u bilo kojem trenutku bez obzira nalazite li se usred aplikacije na neki od poziva za dodjelu granta ili ne. Tako aplikant omogućava pravovremen, detaljan i sveobuhvatan uvid u status svoje organizacije, kako danas, tako i u budućnosti. Rješenje o registraciji / izvod iz registra (ne stariji od godinu dana) može se dostaviti do apliciranja za 2. fazu.

Aplikacije dostavljene na drugačiji način u odnosu na naznačeni u Javnom pozivu ili dostavljene nakon roka, neće biti uzete u razmatranje.



Svaka organizacija može aplicirati s najviše jednim nacrtom projektnog prijedloga u okviru ovog Javnog poziva. U slučaju da neka organizacija dostavi više od jednog projekta, u obzir će se uzeti samo prva pristigla aplikacija.

Aplikanti mogu, ali ne moraju imati partnera u projektu. Izjava o partnerstvu odnosno pisma podrške dostavljaju se u 2. fazi, a više o tome u dijelu Javnog poziva: 2. faza.

Komisija za evaluaciju obavlja preliminarnu ocjenu projektnih prijedloga na osnovi informacija i dokumentacije koju su predali aplikanti.

Preliminarni pregled nacrtu projektnog prijedloga obuhvata sljedeće kriterije:

**Eliminatorski kriteriji:**

- Dostavljena je sva dokumentacija koja je u pozivu navedena kao obavezna, te je popunjen *Eligibility* obrazac.
- Projekt se direktno bavi jednom od navedenih oblasti Javnog poziva.

**Bodovni kriteriji:**

- Problem je opisan na jasan i razumljiv način, te su navedeni podaci koji potvrđuju da problem uistinu postoji.
- Žrtve trgovine ljudima su jedna od glavnih ciljnih korisničkih grupa aktivnosti koje provodi organizacija.
- Organizacija se trenutno bavi pitanjima borbe protiv trgovine ljudima ili pruža podršku na rješavanju ove problematike; organizacija je profesionalizirana za pružanje podrške u radu na problematici navedenoj u oblastima Javnog poziva.
- Projektni prijedlog u skladu je s mjerama navedenim u Strategiji suprotstavljanja trgovini ljudima u Bosni i Hercegovini 2020 – 2023. (u okviru oblasti kojom se projektni prijedlog bavi).
- Postoji jasna veza između odabrane oblasti iz Javnog poziva i projekta.
- Projekt je usklađen s trenutnim i prethodnim intervencijama u oblasti Javnog poziva.
- Projektni ciljevi su u skladu s odabranom oblašću iz Javnog poziva.
- Ciljevi su specifični, mjerljivi i realni i moguće ih je dostići u toku trajanja projekta ili ubrzo nakon završetka.
- Odabrana je prikladna metodologija koja će dovesti do ispunjenja ciljeva.
- Organizacija u svojim ranijim ili trenutnim projektima sarađuje s drugim organizacijama, vlastima, zajednicom i drugim interesnim stranama.
- Organizacija stvara sinergiju s interesnim stranama, vlastima, zajednicom i drugim organizacijama koje se bave borbom protiv trgovine ljudima.
- Organizacija posjeduje kapacitete (strukturu organizacije) da provede projekt.
- Organizacija ima relevantna prethodna dostignuća u odnosu na oblasti iz Javnog poziva.
- Iznos prihoda u svakoj od posljednje tri godine bio je jednak ili veći od traženog iznosa za projekt.

Komisija za evaluaciju kontaktirat će osobe navedene za kontakt i preporuke kako bi se provjerili podaci o prethodno ostvarenim rezultatima.

Nakon što Komisija ocijeni i rangira sve pristigle nacрте projektnih prijedloga, svi aplikanti bit će informirani o ishodu ocjene njihove aplikacije automatskim emailom i putem online platforme za upravljanje grantovima APPLY. S obzirom na mogućnost da email završi u neželjenoj pošti ili da nikako ne stigne, aplikanti se mole da redovno provjeravaju status aplikacije u APPLY-u. Oni projektni prijedlozi koji budu pozitivno ocijenjeni ulaze u 2. fazu apliciranja.

## 2. faza

Od aplikanta koji budu obaviješteni da su uspješno prošli 1. fazu zatražit će se da dostave cijeli projektni prijedlog, koji se može popuniti putem online platforme za upravljanje grantovima APPLY, budžet na obrascu OBR-INS-GRB, biografije osoblja koje će biti angažirano na projektu (kao i osoblja partnerskih organizacija), te ispunjenu Izjavu o partnerstvu, na obrascu OBR-INS-PAR (isključivo ako organizacija ima partnera u projektu) i pismo podrške institucija vlasti (opcionarno).

Pored punog projektnog prijedloga i budžeta, potrebno je dostaviti rješenje o registraciji pravnog lica ili izvod iz registra (dokument ne smije biti stariji od godinu dana). Kao što je navedeno iznad u 1. fazi, ovi se dokumenti dostavljaju putem *Eligibility* obrasca, a putem vašeg APPLY profila (ili klikom direktno na link: <https://s.usaidinspire.ba/#eligibility>).

Prilikom ocjene projektnih prijedloga uzet će se u obzir sljedeće:

- dostavljena je sva dokumentacija koja je u Javnom pozivu i APPLY-u navedena kao obavezna,
- izrađena je dubinska analiza problema koja ukazuje na to da se aplikant razumije u materiju Javnog poziva i aktuelne podatke,
- projektna ideja je u skladu s kriterijima Javnog poziva, jasna je i razumljiva,
- projektni prijedlog u skladu je s mjerama navedenim u Strategiji suprotstavljanja trgovini ljudima u Bosni i Hercegovini 2020 – 2023. (u okviru oblasti kojom se projektni prijedlog bavi),
- aplikant ima specifičan, odgovoran pristup i metodologiju rada sa žrtvama trgovine ljudima,
- projektni prijedlog predviđa direktnu saradnju sa žrtvama trgovine ljudima,
- predložena metodologija za provođenje aktivnosti dovodi do željenih rezultata, specifična je, u skladu je s Javnim pozivom te daje jasnu sliku projektne intervencije,
- projektni prijedlog dostavlja organizacija koja radi sa žrtvama trgovine ljudima i na problematici trgovine ljudima u BiH, te promoviranju prava žrtava trgovine ljudima, ili je profesionalizirana za pružanje podrške u radu na problematici navedenoj u oblastima Javnog poziva,
- očekivani rezultati uključuju izravnu podršku ili zagovaranje u ime žrtava trgovine ljudima,
- projektni rezultati s pripadajućim indikatorima doprinose ispunjenju projektnih ciljeva, specifični su i mjerljivi s preciziranom ciljnom grupom i njihovim brojem,
- jasno su definirani alati za praćenje i evaluaciju projekta koji se mogu iskoristiti za procjenu uspješnosti projekta.
- budžet odražava dobar odnos uloženog novca i postignutih rezultata; projektne aktivnosti usklađene su s troškovima, a troškovi su jasno pojašnjeni u narativnom dijelu budžeta,
- aplikanti se ohrabruju da imaju sufinansiranje, bilo u naturi ili u novcu,
- projektni prijedlog ne temelji se isključivo na izradi i distribuciji promotivnog i zagovaračkog materijala, ili samo na održavanju seminara i treninga, te izbjegava nepotrebne troškove,
- iz projektnog prijedloga vidljivo je da postoje realne mogućnosti da se postigne rezultat tokom trajanja projekta ili netom nakon toga,



- aktivnosti su ravnomjerno raspoređene tokom trajanja projekta, a njihov raspored je realan i hronološki dobro usklađen,
- prepoznati su potencijalni rizici u provođenju projekta i opisane su mjere kojima bi se oni umanjili,
- organizacije pokazuju sposobnost za uspješno partnerstvo s vlastima, drugim organizacijama i raznim interesnim stranama koji rade s marginaliziranom populacijom u BiH,
- specifični ciljevi dovode do ispunjenja općeg cilja, mjerljivi su i realni, te postoji realna mogućnost da se postignu tokom trajanja projekta ili netom nakon njega,
- projektni prijedlog promovira održivost ostvarenih projektnih ciljeva i rezultata,
- projekt je zastupljen u javnosti kroz promotivne aktivnosti, predviđa pojavljivanje u javnosti kako bi dosegao širu publiku, te omogućuje pojavljivanje donatora,
- organizacije stvaraju sinergiju s interesnim stranama, vlastima, zajednicom i drugim organizacijama koje se bave istom oblašću djelovanja,
- aplikant jasno identificira potencijalne negativne učinke intervencija/aktivnosti koje namjerava implementirati i predlaže mjere koje namjerava preuzeti da bi se taj rizik izbjegao,
- predloženi projekt nije ponavljanje nekog drugog tekućeg ili završenog projekta, temelji se na uspješnosti trenutnih i prethodnih intervencija u oblasti borbe protiv trgovine ljudima, te koristi najbolje prakse i naučene lekcije,
- aplikant demonstrira razumijevanje problema trgovine ljudima i posjeduje znanje o postojećim intervencijama/projektima koje se bave ovom temom,
- aplikant pokazuje inovativnost u pristupu koja se temelji na naučenim lekcijama i najboljim praksama, te predlaže nadogradnju na postojeće i/ili prethodne projekte ili partnerstvo sa postojećim intervencijama u oblasti borbe protiv trgovine ljudima.

Aplikanti mogu, ali ne moraju imati partnera u projektu. Partneri u projektu mogu biti nevladine organizacije (udruženja i fondacije) registrirane u BiH, za šta dostavlja ispunjen obrazac Izjave o partnerstvu. Ukoliko aplikant ima podršku institucija vlasti s nekog od nivoa u BiH, drugih organizacija ili interesnih strana, potrebno je dostaviti njihova pisma podrške. Izjavu o partnerstvu, kao i pisma podrške dostavljaju se u ovoj, 2. fazi, ukoliko aplikant bude odabran za učešće u 2. fazi.

Traženi iznos u 2. fazi mora biti jednak ili niži u odnosu na traženi iznos u 1. fazi (u slučaju pronalaska dodatnih donatora do 2. faze apliciranja). Traženi iznos u 2. fazi apliciranja ne smije biti veći od traženog iznosa u 1. fazi, što može dovesti do eliminacije u 2. fazi. Trajanje projekata ne može se mijenjati u odnosu na navedeno trajanje u 1. fazi.

Ukoliko USAID/INSPIRE nakon 1. faze dopisom traži odgovore ili pojašnjenja na određene dijelove nacrtu projektnog prijedloga, potrebno je da aplikant službenim dopisom odgovori na ova pitanja, te da ovaj dopis bude prilog uz punu projektnu aplikaciju, koji će se smatrati prilogom uz finalnu aplikaciju.

Nakon procjene punih projektnih prijedloga svi aplikanti bit će informirani o ishodu ocjene njihove aplikacije automatskim emailom i putem online platforme za upravljanje grantovima APPLY. S obzirom na mogućnost da email završi u neželjenoj pošti ili da nikako ne stigne, aplikanti se mole da redovno provjeravaju status aplikacije u APPLY-u.

Oni projektni prijedlozi koji budu pozitivno ocijenjeni ulaze u fazu pregovora o dodjeli granta i fazu potpisivanja ugovora. U fazi pregovora će USAID/INSPIRE i aplikant usaglasiti projektni prijedlog, naročito dijelove koji se odnose na isporuke, monitoring i evaluaciju projekta. USAID/INSPIRE će za osoblje organizacija koje uđu u fazu pregovora o dodjeli granta organizirati informativne radionice s ciljem unaprjeđenja projektnih prijedloga, posebno dijelova koji se odnose na teoriju promjene, postavljanje i praćenje projektnih indikatora te projektnog budžeta.

Obavijest o pozitivnoj ocjeni projektnog prijedloga ne znači neminovno da će USAID/INSPIRE s organizacijom potpisati ugovor niti da će projektni prijedlog biti financiran. Potpisivanjem ugovora o dodjeli granta uređuju se međusobni odnosi saradnje, prava i obaveze obje ugovorne strane.

Korisnik granta iz sredstava USAID-a dužan je imati UEI (Unique Entity ID). Uputstvo se nalazi na sljedećem linku: <https://sam.gov/content/entity-registration>.

Ukoliko korisnik granta od ranije nema važeći UEI broj, bit će dužan registrirati se najkasnije mjesec dana nakon početka implementacije projekta i dostaviti svoj UEI broj kroz online formu <https://s.usaidinspire.ba/SAMreg>. Korisnik granta bit će obavezan jednom godišnje ažurirati podatke na [www.sam.gov](http://www.sam.gov). U slučaju da validnost registracije u sistemu SAM istekne, USAID/INSPIRE će moći bez odgađanja raskinuti ugovor o dodjeli granta.

## Uvjeti dodjele granta

Organizacije koje budu imale najbolje projektne prijedloge i budu odabrane u užu krug kandidata dužne su omogućiti USAID/INSPIRE da provede predgrantovsku procjenu rada i poslovanja organizacije u prethodnom periodu. Predgrantovska procjena podrazumijeva analizu organizacijskih, finansijskih, administrativnih i ljudskih resursa aplikanta.

Samo organizacije čiji projekti budu najbolje ocijenjeni i koje uspješno prođu proces predgrantovske procjene mogu biti korisnici granta. USAID nema obavezu pojedinačno obrazlagati svoju odluku aplikantima. USAID zadržava pravo da ne dodijeli sva raspoloživa sredstva predviđena Javnim pozivom.

## Jačanje organizacijskih kapaciteta

Potpisivanje ugovora o dodjeli granta podrazumijeva, pored implementacije projektnih aktivnosti, i spremnost organizacija da aktivno učestvuju u razvoju svojih organizacijskih kapaciteta uz punu podršku USAID/INSPIRE.

Razvoj organizacijskih kapaciteta podrazumijeva:

- implementaciju nalaza i preporuka iz predgrantovske procjene (PGR) u toku trajanja projekta, koja se provodi prije potpisivanja ugovora sa USAID/INSPIRE i uvjet je za potpisivanje ugovora;
- aktivan rad na jačanju kapaciteta i unaprjeđenju postojećih pravilnika i procedura koji uređuju rad organizacije, tamo gdje to bude potrebno (kroz alat KULT/POK<sup>3</sup>).
- učešće na edukacijama i treninzima koje organizira USAID/INSPIRE (do devet treninga u toku godine za osoblje organizacije);

<sup>3</sup> KULT/POK<sup>®</sup> – alat za procjenu organizacijskih kapaciteta: <https://KULT.smapply.io/res/p/kult-pok>

- korištenje KULT/POP alata za samoprocjenu organizacijskih performansi i provođenje KULT/POP<sup>4</sup> procesa jačanja i razvoja performansi organizacije.

Organizacije trebaju prilikom planiranja osoblja angažiranog na projektu predvidjeti dio radnog vremena koji će se odnositi na jačanje organizacijskih kapaciteta.

Predgrantovska procjena provodi se nakon 2. faze aplikacije, a prije potpisivanja ugovora i uvjet je za potpisivanje ugovora s USAID/INSPIRE. U slučaju nepoštivanja rokova za dostavljanje aplikacije, ili rokova vezanih za predgrantovsku reviziju, aplikant će biti eliminiran.

## Rok za dostavljanje nacrt projektnog prijedloga

Od aplikanata se traži da **do 17. 2. 2023. do 16.00 sati** dostave nacrt projektnog prijedloga u elektronskom obliku, sa svim traženim priložima, putem online platforme za upravljanje grantovima APPLY, nakon čega će aplikanti odmah dobiti automatski e-mail kao potvrdu o prijemu aplikacije. Nacrti projektnih prijedloga koji ne budu dostavljeni na navedeni način, neće biti uzeti u razmatranje. Aplikanti koji ne zaprime automatski odgovor o prijemu aplikacije u roku od 30 minuta od slanja trebaju se odmah javiti na elektronsku adresu [prijava@usaidinspire.ba](mailto:prijava@usaidinspire.ba) (subject/predmet: 20.04.0-N2.3-6928, Upit).

Napomena: Svi potencijalni aplikanti trebaju pristupiti registraciji na online platformu za upravljanje grantovima APPLY putem linka: <https://s.usaidinspire.ba/apply> čim prije, kako bi se upoznali s uvjetima i tehničkim postavkama aplikacije. Detaljne instrukcije o procesu registracije mogu pronaći na linku: <https://s.usaidinspire.ba/applyti>.

U slučaju izmjene Javnog poziva USAID/INSPIRE će objaviti tekst s naglašenim izmjenama na stranici: <https://s.usaidinspire.ba/applyc1>.

###KRAJ DOKUMENTA##

---

<sup>4</sup> KULT/POP® – alat za procjenu organizacijskih performansi: <https://kult.smapply.io/res/p/kult-pop>